

आकाशवाणी रायपुर (छत्तीसगढ़)
प्रादेशिक समाचार (छत्तीसगढ़ी)

1810 सोमवार

02.09.2024

प्रमुख समाचार –

- 1— केंद्रीय मंत्रिमंडल ह कुल दू हजार आठ सौ सत्रह करोड़ रुपिया के लागत वाला डिजीटल कृषि मिसन ल दीन मंजूरी।
- 2— मुख्यमंत्री विष्णुदेव साय ह रईपुर के निवास म होवइया तीजा-पोरा कारीकरम के दौरान महतारी वंदन योजना के सातवां किस्त करीन जारी – सुपोषण रथ ल हरा झंडी दिखाके करीन रवाना।
- 3— छत्तीसगढ़ के लोकपर्व पोला आज प्रदेश भर म पारंपरिक उछाह के संग मनाय जात हे— किसान मन ह अपन नांगर अउ बइला के करीन पूजा-पाठ।

केंद्रीय मंत्रिमंडल-निर्णय

केंद्रीय मंत्रिमंडल ह कुल दू हजार आठ सौ सत्रह करोड़ रुपिया के लागत वाला डिजीटल कृषि मिसन ल मंजूरी दे देहे। आज नई दिल्ली म मीडिया ले ए जानकारी साझा करत सूचना अउ प्रसारण मंत्री अश्विनी वैष्णव ह किहीन कि मंत्रिमंडल के बइठका म किसान मनके जीवन म सुधार अउ उंखर आय बढ़ाय बर कतकोन जरूरी फैसला ले गीस।

उहे, केंद्रीय मंत्रिमंडल ह खाद्य अउ पोषण सुरक्षा बर तीन हजार नौ सौ उनयासी करोड़ रुपिया के लागत वाले योजना ल मंजूरी दीन।

केंद्र सरकार ह दू हजार दू सौ इंक्यानवे करोड़ रुपिया के लागत ले किसानी शिक्षा अउ प्रबंधन ल मजबूत करे के घलो निर्णय लेहे। मंत्रिमंडल के बइठका म एक हजार सात सौ दू करोड़ रुपिया के लागत ले पशुधन स्वास्थ्य अउ उंखर जनसंख्या बढ़ाय के योजना ल घलो मंजूरी दे गीस। एखर अलावा आठ सौ साठ करोड़ रुपिया के लागत ले बागवानी के सतत विकास कारीकरम ल अनुमति दे गीस। एक हजार दू सौ दू करोड़ रुपिया के लागत ले कृषि विज्ञान केंद्र अउ एक हजार एक सौ पंद्रह करोड़ रुपिया के लागत ले प्राकृतिक संसाधन प्रबंधन ल घलो मजबूत करे के निर्णय ले गेहे।

मुख्यमंत्री-पोषण माह-शुभारंभ

मुख्यमंत्री विष्णुदेव साय ह रईपुर के निवास म होवइया तीजा-पोरा महतारी वंदन योजना कारीकरम के दौरान प्रदेश म राष्ट्रीय पोषण माह के सुरुआत करीन। ए बेरा म ओमन ह सुपोषण रथ ल हरा झंडी दिखाके रवाना करीन। संगेसंग ओमन ह उंहा उपस्थित माईलोगन मन ल पोषण माह के सपथ दिलाइन। ए सुपोषण रथ राज्य के आने-आने गांव मन म घूम के लोगन मन ल पोषण के संदेस दिही। ए रथ म सुपोषण उपर केंद्रीय फिल्म के प्रदर्शन करे जाही। सुपोषण रथ के जरिया ले प्रदेश के आने-आने जिला मन म पोषण अउ स्वास्थ्य संबंधी ऑडियो, वीडियो संदेस के प्रसारण करे जाही।

ए बेरा म मुख्यमंत्री ह किहीन कि स्वस्थ अउ सुपोषित छत्तीसगढ़ के अवधारना ल साकार करे बर राज्य सरकार कृत संकल्पित हे। कुपोषण अउ एनीमिया जइसन चुनौती के सामना करे बर छत्तीसगढ़ शासन डहार ले गंभीर प्रयास करे जात हे। मुख्यमंत्री ह किहीन कि पोषण माह के दौरान ए बछर एनीमिया वृद्धि निगरानी, पूरक पोषण आहार, पोषण भी पढ़ाई भी, गुणवत्ता पूर्ण सेवा देबर तकनीक के प्रयोग अउ पूरा पोषण उपर धियान केंद्रीत करे जात हे। जानबा के मुताबिक प्रदेश म काली एक सितंबर ले पोषण माह के सुरुआत हगे हे, जउन तीस सितंबर तक चलही।

पोला

छत्तीसगढ़ के लोकपर्व पोला आज प्रदेश भर में पारंपरिक उछाह के संग मनाय जात हे। ए बेरा में किसान मन ह अच्छा फसल के कामना के संग अपन हल अउ बइला के पूजा-पाठ करीन। पोला तिहार किसानी संस्कृति में पशुधन के महत्व ल देखाने वाला परब हे। आज लइका मन ह मिट्टी ले बने बइला अउ आने-आने खिलौना के आनंद उठाइस।

रईपुर के मुख्यमंत्री निवास में घलो आज तीजा-पोरा तिहार धूमधाम ले मनाय गीस। एमा बड़ संख्या में महिला मन ह उछाह के संग भाग लीस।

मुख्यमंत्री विष्णुदेव साय ह अपन निवास में होवइया तीजा-पोरा महतारी वंदन तिहार के मउका में महतारी वंदन योजना के सातवां किस्त के रासि एक-एक हजार रुपिया माईलोगन मनके खाता में भेजिस। योजना के तहत सत्तर लाख महिला मन ल छै सौ तिरपन करोड़ रुपिया के भुगतान करे गीस। एला मिलाके अब तक चार हजार पांच सौ अठहत्तर करोड़ रुपिया के रासि के भुगतान करे जा चुके हे।

कारीकरम में उप मुख्यमंत्री अरुण साव, वनमंत्री केदार कश्यप, राजस्व मंत्री टंकराम वर्मा, महिला अउ बाल विकास मंत्री लक्ष्मी राजवाड़े मौजूद रिहीन।

उहें, पोला तिहार के बेरा में राजधानी रईपुर के रावणभाठा में बइला दौड़, बइला सजावत अउ किसान सम्मान समारोह के आयोजन घलो करे गीस। मुख्य अतिथि के रूप में खेल अउ युवा कल्याण मंत्री टंकराम वर्मा सामिल होइन।

ई-संजीवनी टेलीमेडिसिन

दंतेवाड़ा जिला प्रशासन डहार ले संचालित ई-संजीवनी टेलीमेडिसिन सेवा अति संवेदनशील क्षेत्र मन में स्वास्थ्य सेवा के विस्तार में अहम भूमिका निभावत हे। जिला के अरनपुर, पालनार अउ आने दूरस्थ उप स्वास्थ्य केंद्र मन के माध्य में ले लोगन मन के घर तक गुणवत्तापूर्ण स्वास्थ्य सेवा पहुंचाय जावत हे। वर्तमान में रोज पचास ले जादा मरीज ई-संजीवनी के माध्यम ले टेलीमेडिसिन सेवा के लाभ उठावत। ए सुविधा सुरू होय ले अब मरीज मन ल इलाज बर गांव ले बाहिर नइ जाना पड़ही। मरीज वीडियो काल के जरिया ले डॉक्टर मन ले सीधा गोठबात करके अपन स्वास्थ्य संबंधी परेसानी बतावत हे।

संपूर्णता-अभियान

मोहला-मानपूर-अंबागढ़ चौकी जिला के दूसरइया सालगिरह के बेरा में जिला मुख्यालय में आज संपूर्णता अभियान के तहत कारीकरम में आयोजित करे गीस। ए दौरान आने-आने विभाग डहार ले स्टाल लगाके उत्पाद अउ उपकरण मन ल प्रदर्शित करे गीस। उहें, कारीकरम में सामिल होय बर पहुंचे सांसद संतोष पाण्डेय ह कलेक्टर अउ पुलिस अधीक्षक के संग स्टाल के अवलोकन करीन। कारीकरम के दौरान जिला के दूरस्थ इलाका के मरीज मन बर "डॉक्टर आपके द्वार" योजना के तहत एम्बुलेंस सुविधा के सुरूआत घलो करे गीस। सांसद ह हरी झंडी देखाके एम्बुलेंस ल रवाना करीस। उहें, कारीकरम में सांसद ह स्कूली लइका मन ल साइकिल बांटिन।

बीजापुर—जनदर्शन

बीजापुर कलेक्टर संबित मिश्रा ह जिलावासी मनके समस्या के निवारण बर जिला कार्यालय बीजापुर म हफ्ता म दू दिन सोमवार अउ गुरुवार के जनदर्शन कारीकरम आयोजित करे के घोसना करे हे। जनदर्शन कारीकरम के दिन जिला कलेक्टर बिहनिया ग्यारा बजे ले आमलोगन मन ले मिलही अउ उंखर समस्या के समाधान बर संबंधित विभाग मन ल जरूरी निरदेस दीन।

क्रीडा—प्रतियोगिता

जांजगीर—चांपा जिला के हाईस्कूल मैदान म काली ले चौबीसवां राज्य स्तरीय शालेय क्रीडा प्रतियोगिता सुरू हगे हे। चार दिन तक चलइया ए प्रतियोगिता के सुरूआत सांसद कमलेश जांगडे ह करीन। ए प्रतियोगिता म पांच जोन—बस्तर, बिलासपुर, दुर्ग, रईपुर अउ सरगुजा के खिलाडी सामिल होवत हे। शालेय क्रीडा प्रतियोगिता म बालक अउ बालिका दूनो वर्ग म फ्रीस्टाइल कुस्ती, ग्रीको रोमनो, मलखंभ, हैण्डबॉल अउ साफ्टबॉल जइसन खेल के आयोजन करे जाही। एखर समापन चार सितंबर के होही।

कांग्रेस—प्रदर्शन

प्रदेस म माईलोगन मन संग होवत आपराधिक घटना अउ उंखर सुरक्षा ल लेके कांग्रेस काली तीन सितंबर के प्रदेस के सबो जिला मन म प्रदर्शन करही। ए मामला ल लेके आज कांग्रेस ह पूरा प्रदेस म प्रेस कांफ्रेंस करीन। ओमन ह आरोप लगाइन कि भाजपा सरकार के नौ माह के कार्यकाल म प्रदेस के माईलोगन मन असुरक्षित हगे हे।

संक्षिप्त समाचार

— गौरेला—पेंड्रा मरवाही जिला के शिक्षिका स्वपनिल पवार अउ अर्चना सेमुएल मसीह ल राज्य शिक्षक सम्मान पुरस्कार ले सम्मानित करे जाही। अवइया पांच सितंबर के शिक्षक दिवस के दिन राजधानी रईपुर म होवइया राज्य स्तरीय शिक्षक सम्मान समारोह म राज्यपाल शिक्षक मन ल पुरस्कृत करही।

— साक्षरता कारीकरम के तहत जन—जागरूकता लाय अउ शिक्षा के प्रचार—प्रसार करे के उद्देश्य ले गौरेला—पेंड्रा मरवाही जिला के कलेक्टर लीना कमलेश मंडावी ह आज उल्लास साक्षरता रथ ल हरा झंडी देखाके रवाना करीन।

— बालोद जिला के राजहरा थाना पुलिस ह अवैध सराब परिवहन करइया एक आरोपी ल गिरफ्तार करे हे। आरोपी तीर ले देसी सराब के तीस बोतल जब्त करे गेहे।

